



34-9-6-8

10

131

DE INEFFABILI
TRINITATIS
MYSTERIO
ORATIO

Habita in Sacello Pontificio

AD SANCTISSIMUM D. N.

BENEDICTUM XIV.
PONT. MAX.

A

JOANNE LERCARI

PATRICIO GENUENSI

Collegii Clementini Convictore.



ROMÆ, Typis Bernabò, & Lazzarini, MDCCXLI.

SUPERIORUM PERMISSU.

SANCTISSIMO PATRI
BENEDICTO XIV.
 PONT. MAX.

JOANNES LERCARI
 FELICITATEM.



*I qua alias Oratio habita
 multis de caussis ad Te pertinuit, BEA-
 TISSIME PATER, hanc certe dixerim, cujus
 Te coram pronuntiandæ onus mihi hono-
 rificentissimum demandatum est. Etenim*

A 2


non

*non ea est solum, quæ Tibi conveniat
 quam maxime, propterea quod de Sanctis-
 simæ TRINITATIS Mysterio agat, quod ad
 Fidei, quam profitemur, præstantiam si-
 gnificandam Ecclesia universa, cujus Ca-
 put es, constantissime, atque integerrime
 veneratur: sed illa insuper, cujus texen-
 da ex Pontificatus ad totius Christiani
 Orbis præsidium atque incrementum ad
 Te delati egregiis bonis ac fere divinis
 argumentum nactus sum. Accedit quo-
 que in eo me Collegio censerî, atque in-
 stitui, in quo sicuti Te olim a puero fuisse
 versatum, mihi cunctisque in eodem de-
 gentibus pulcherrimum est, ac multo glo-
 riosum recordari; sic Tibi etiam haud
 molestum, quin ausim dicere jucundum,
 singulari illa, qua omnes & singulos in
 hanc domum adscriptos, benevolentia
 munificentiaque complecteris, testatum
 esse voluisti. Atque id omne profecto in
 causa est, cur non sim deterritus, quo-
 minus paginam hanc meam Tuo sacro
 nomini inscriptam voluerim; etsi multa,
 nec levia quidem se mihi objicerent, quæ
 a su-*

a suscepto consilio me jure avertere potuissent . Hinc enim scriptiunculam ipsam nulla elaboratam industria , nulla arte perfectam , rudem utique , crassoque filo contextam videbam : illinc vero Sapientia Tua occurrebat animo , quæ sane quanta sit , cum superiori ætate , tum palam eo maxime die gentium omnium literis ac linguis celebrando comprobasti , quum amplissimorum Cardinalium , Judicumque corona stipatus , Romæ spectante , unaque doctissimo Jurisperitorum admirante cœtu singulorum sententiis ad trutinam antea vocatis , seu lites æquissime composuisti , seu justissime jure contendentibus adjudicasti . Quod profecto illius tantummodo poterat esse Pontificis , quem scilicet & incredibili ferme doctrina instructum , & rursus dexteritate , consilio , pietate , ceterisque virtutibus cumulatissimum divina Ecclesiæ Providentia reservavit , ut iis par esset malis propulsandis , quorum omnium maturitas calamitosissimis hisce temporibus in Europam jam jam erumpere universam videtur . Verum

quorsum hæc? An Tuis in laudibus aures adeo peregrinantur meæ, ut apprime non intellexerim maximas inter virtutes Tuas non postremam habendam esse Humanitatem, qua omnes excipis amantissime, neminem non Tibi devinctum, non lætum, non effusè Te prædicantem dimittis? Hocce igitur munus, BEATISSIME PATER, quantulumcumque est totum certe tuum, ad sanctissimos pedes Tuos provolutus Tibi sisto; quod quidem si lubenti a Te animo exceptum cognovero, meque simul Apostolica Tua benedictione munitum, tum denique non mediocri me bono cumulatum judicabo.





O R A T I O .



UÆ res , BEATISSIME PATER , in loci hujus amplitudine , & sanctitate ad dicendum accedentem vehementer commovere consueverunt , hæ profecto singulæ hodierno die obversantur animo , & divina simul atque humana cogitantem in varias trahunt partes diducuntque . Sive enim propositi altitudinem argumenti confidero , de abditissimo divinæ TRINITATIS Mysterio mihi differendum est , cui parem eloquendi copiam , rerumque magnitudinem invenire , cum factæ arduum omnino , tum etiam est cogitatu temerarium , sive eum intueor , apud quem dico , Te præ-

sente

*Anselmus de
Incarnat. ad
Urbanum .*

*Bernard. l. 2.
de Consol. ad
Eugen.*

sente mihi verba facienda sunt, qui quum universæ Ecclesiæ Dominus, & Pater, Sacerdos Magnus, Princeps Episcoporum, Potestate Petrus, Unctione Christus meritò habearis, incredibili quadam, ac plusquam humana, prope dixerim, Majestate mentem ita offundis, ut in ipso orationis vestibulo hæream vel invitus, totisque artubus contremiscam. In tanta igitur rerum magnificentia quum verfer, desponderem profecto animum, ultroque victus recederem, nisi ipsa Pontificis dignitas, qua ceteris hominibus ad Deum propior accedis, eam mihi loquendi materiem ex tempore aperiret, quæ Auditoris æque, ac Mysterii præstantiam minime prorsus deceat. Summa enim, atque excellentia Pontificatus privilegia quemadmodum eximiam quamdam, ut ita dicam, Sanctissimæ TRINITATIS imaginem præseferunt, ita illud efficiunt, ut, quantum homini licet, ad maximi hujus Arcani cognitionem animus assurgere videatur.

Et quidem amplissima illa, nullisque circumscripta finibus a Christo in commissum gregem Romano Pontifici tradita potestate, qua Ipse tam dominatur in eos, qui Catholica Religione censentur, quam eos ex credentium communione exterminat, qui Fidei bellum in-
di-

dicentes funestum cum portis Inferi foedus
 pepigere , qua eandem adversus nefarias per-
 fidissimi hostis machinationes incolumem , in-
 violatamque ita conservat , ut nulla sit in ea Cant. Cantic.
cap. 4. v. 7.
 macula , qua Coelum aperit , & nemo claudit ,
 claudit , & nemo aperit , ligat , & solvit , quis Math. 16.
ver. 19.
 unquam Dei potentiam referri probe non
 intelligat , quæ verbo condidit universa , at-
 que in dies moderatur , quæ superbientes Spi-
 ritus in tenebras detrusit sempiternas , quæ
 populum suum in manu Moïsis & Aaron at- Psalms. 76.
 tritis servitutis laqueis per maris undas ex
 Ægypto deduxit , quæ ad Principem hujus Joann. 12.
 Mundi foras ejiciendum , nosque incolumes
 ab improbis ejus conatibus servandos e sinu
 Verbum suo in terras demisit ? Quod si ad
 firmissimam illam oraculorum veritatem
 mentem inde convertimus , qua Deus in om-
 nibus tum Fidei , tum morum disceptationi-
 bus supremum ita præditum voluit Antisti-
 tem , ut neque a quopiam falli , neque fallere
 quempiam possit : quum haud humanæ pro-
 fecto scientiæ , qua inflari homines potius , & 1. Cor. cap. 8.
 sæpenumero etiam , quod luctuosissimum est ,
 in errores abripi præcipientes solent ; sed di-
 vinæ dumtaxat Sapientiæ sit : eximio isto ,
 ac plane necessario universæ Ecclesiæ Pastori
 privilegio æternam Dei Sapientiam exprimi
 non

Proverb. cap. 8. vers. 15. non exploratum esse potest nemini, Sapientiam, inquam illam, per quam Reges regnant, & legum conditores justa decernunt, qua duce nobis ad Coelum facilis sternitur via, qua magistra, coelestium explicatur veritas mandatorum, qua denique adjutrice, beata hominum vita in tuto collocatur. Equis enim nesciat, *Joann. 14. v. 6.* viam, veritatem, ac vitam, quum homines inter factus homo versaretur, æterni Patris Filium se prædicasse? Jam porro voces illæ suavitatis, atque amoris plenæ, quibus Servator Pastorem se bonum appellat oves suas pascentem, quibus Petro, Romanisque Episcopis carissimum gregem dulcissime commendat: *Joann. 10. v. 11.* Pasce oves meas, quid aliud sane innuunt, nisi Spiritum caritatis summo Christiani Ovili Pastori eo consilio immissum, ut non modo editissimæ virtutum cumulus dignitati accederet; sed etiam, ut ei divino quodam, atque indissolubili vinculo Ecclesia jungeretur universa? Quo quidem nihil est, quod magis ad credentium concionem bene temperandam, conducatur. Etenim, qua unquam ratione vel ducere oves Pastor suas, vel ducentem sequi oves possunt, nisi Ipse suas cognoscat, Ipsum suæ? Quid autem est cognoscere, nisi amare? Itaque, BEATISSIME PATER, Te certe omnes, mente, oculis, fronte divinæ caritatis speciem,

ciem, atque adeo Deum ipsum, qui Caritas
 ipsa est, repræsentare intelligant oportet:
 haud enim fieri potest, quin ea voluntate, qua
 Gentes in justitiæ semitam dirigis, fœcundes
 excitas, excitatas erigis, in viam revocas
 aberrantes, Dei Amorem erga homines ex-
 pressum deprehendant, qui nos omnes vult
 salvos fieri, atque ad agnitionem veritatis
 venire, ut filii Dei nominemur, & simus,
 hæreditatemque beatissimam nobis in Cœlis
 conservatam tandem adeamus. Quæ, si vera
 sunt, si præcipua quadam ratione Patrem;
 quippe omnis originis fons est, Omnipoten-
 tem vocamus, si Filium, qui æternum Patris
 verbum est, Sapientiam, si Spiritum Sanctum,
 qui utriusque amor est, Bonitatem; nemo sane
 non viderit Pontificia dignitate, una quidem,
 triplici tamen potestatis, sapientiæ, amoris
 munere ita constituta, ut alterutrum eorum si
 desideretur, ipsa omnino esse non possit, Sa-
 cerdotem Maximum Unitatem Dei, ac Per-
 sonarum Trinitatem significare, eo sane nexu
 conjunctam, ut neutra invicem abstrahi queat,
 quin Dei natura funditus evertatur. Quam
 ob rem in gloriosa magni hujusce diei celebri-
 tate gratiæ habeantur Deo quam maximæ,
 qui quum in admirabile lumen suum nos vo-
 caverit, & Sacramentum supra humanam
 omnem

*Joann. Ep. 1.
cap. 4. v. 8.*

*Paul. 1. Ti-
mot. 2.*

*1. Joann. c. 3.
Petr. 1. v. 4.*

*Catechif. Rom.
Par. 1. cap. 2.
§. 14.*

*Petr. 1. cap. 8.
v. 9.*

omnem investigationem positum , tamquam certissimam genuinæ Fidei tesseram , nobis credendum proposuerit ; in supremo tamen Pontifice , eximiis in eum bonis undique collatis , ita ejusdem imaginem exhibuit , ut per hanc ad illius cognitionem , quantum est in nobis , pervenientes in AUGUSTISSIMÆ TRINITATIS venerationem impensius effunderemur . Id autem reliquum est , BEATISSIME PATER , ut jam Universitatis hujus Conditorem , ac Dominum , Solem Sapientiæ , Caritatis Fontem etiam atque etiam enixe rogemus , ut claritatis suæ radiis excussæ nationes omnes , ex quæsitis hæreseos latebris emergant aliquando : & depulsa errorum omnium caligine , ad Unum Trinumque Deum colendum , Teque simul Pastorem unum maximumque immutabili Religione , & perfecta jugiter caritate cum Ecclesia consocientur .

F I N I S .



